

Samþykkt þessi, sem sýslunefnd Suður-Múlasýslu hefur samið og samþykkt, samkvæmt lögum nr. 102 19. júní 1933, um samþykktir um sýsluvegasjóði, sbr. lög nr. 50 17. maí 1947 og lög nr. 37 23. maí 1959, staðfestist hér með og birtist til eftirbreytni öllum þeim, sem hlut eiga að máli.

Samgöngumálaráðuneytið, 5. júní 1963.

Ingólfur Jónsson.

Brynjólfur Ingólfsson.

FUNDARSKÖP

fyrir bæjarstjórn Siglufjarðar.

1. gr.

Bæjarstjórn Siglufjarðar er skipuð 9 kjörnum bæjarfulltrúum. Þeir ræða og gera ályktanir um bæjarmálefni á bæjarstjórnarfundum.

„Fundarmenn“ tekur í fundarsköpum þessum til bæjarfulltrúa og bæjarstjóra.

Auk bæjarfulltrúa á bæjarstjóri sæti á fundum bæjarstjórnarinnar með mál-
frelsi og tillögurétti.

Bæjarstjórnarfundir eru lögmætir, ef löglega er til þeirra boðað samkvæmt fundarsköpum og mættir eru 5 bæjarfulltrúar.

2. gr.

Í júnímánuði kýs bæjarstjórn á fyrsta reglulegum fundi eftir bæjarstjórnar-
kosningar sér forseta og tvo varaforseta, alla úr hópi bæjarfulltrúa.

Sá er réttkjörinn forseti, sem fær meiri hluta atkvæða þeirra bæjarfulltrúa, sem á fundi eru. Nú fær enginn svo mörg atkvæði, og skal þá kjósa að nýju óbundinni kosningu. Ef enginn fær þá næga atkvæðatölu, skal kjósa um þá tvo, er flest atkvæði fengu, og ef tveir eða fleiri, sem um skyldi kjósa, hafa fengið jafn-
mörg atkvæði, þá skal varpa hlutkesti um hverja skuli kjósa. Ef enn fær hvorugur þeirra meiri hluta, þá skal sá vera forseti, er fleiri atkvæði fær, en ef þeir fá jafn
mörg atkvæði, ræður hlutkesti, hvor skuli vera forseti. Með sama hætti skal kjósa
varaforseta. Þeir skulu gegna forsetastörfum, ef forseti forfallast eða hans missir
við, unz kosinn er nýr forseti. Varaforsetarnir tveir skulu kosnir hlutbundinni
kosningu, ef tveir bæjarfulltrúar óska þess.

3. gr.

Forseti stjórnar fundum bæjarstjórnar. Hann sér um, að allt fari reglulega
fram, og eru bæjarfulltrúar og bæjarstjóri skyldir að hlíta úrskurðum hans um
allt, er varðar fundarsköp. Úrskurði forseta má þó skjóta til úrlausnar bæjar-
stjórnar, ef vafi leikur á um skilning fundarskapa.

Ef enginn kjörinna forseta er mættur til bæjarstjórnarfundar, skal aldurs-
forseti viðstaddra bæjarfulltrúa setja fund og stjórna honum, eða kosningu sér-
staks fundarstjóra fyrir þann fund.

4. gr.

Bæjarstjórn kýs tvo skrifara og tvo varaskrifara úr sínum hópi á sama fundi,
sem forsetakosning fer fram. Skrifara skal kjósa hlutfallskosningu. Skrifarar skulu
telja saman atkvæði, þegar atkvæðagreiðsla fer fram og þegar kjósa skal nefndir

eða menn til annarra starfa. Bæjarstjórn ræður og sérstakan fundarskrifara utan bæjarstjórnar, sem skal halda gerðabók undir eftirliti forseta bæjarstjórnar. Í lok fundar skal forseti og bæjarfulltrúar undirrita gerðabók bæjarstjórnar. Fundarmenn eiga heimting á því, að bókaðar verði athugasemdir þeirra í gerðabók, ef þeim þykir þar eitthvað rangt bókað eða ónákvæmt, svo og stuttlega um ágreinings- atkvæði sín, enda skal það lagt fram skriflega áður en fundi er slitið.

5. gr.

Nefndir til þess að starfa að einstökum málum, hvort sem þær eru fastanefndir, eða nefndir til þess að fjalla um einstök mál, skal kjósa hluthbundnum kosningum, eftir aðferð þeirri, sem kennd er við de Hondt, nema bæjarstjórn sé öll sammála um annað kosningafyrirkomulag.

Í fastanefndir bæjarstjórnar skal kjósa í júnímánuði á fyrsta reglulegum fundi eftir bæjarstjórnarkosningar.

Sérhver bæjarfulltrúi er skyldur að taka sæti í hverri þeirri nefnd, sem hann er löglega kosinn í. Sá, sem er fyrstur kosinn á lista, kallar nefnd saman og lætur kjósa formann og ritara hennar, nema formaður sé kosinn á annan hátt. Um leið og nefnd lýkur störfum, getur hún, eða ef hún er klofin, hvor hluti hennar kosið sér framsögumann.

6. gr.

Reglulegir bæjarstjórnarfundir skulu haldnir í hverjum mánuði, nema í júlí og ágúst. Fundirnir skulu hefjast kl. 17 og standa svo lengi, sem þörf þykir, þó ekki lengur en til miðnættis.

Aukafundi skal halda, þegar bæjarstjóri eða 3 bæjarfulltrúar óska þess. Bæjarstjóri ákveður stað og stund til aukafundahalds, nema annað sé ákveðið.

7. gr.

Bæjarstjóri semur dagskrá bæjarstjórnarfunda.

Hvert það bæjarmál, sem nefnd eða bæjarfulltrúi krefst að tekið sé á dagskrá, er skylt að taka á hana. En bæjarstjóri má því aðeins taka mál á dagskrá reglulegs bæjarstjórnarfundar, að beiðni um það sé komin honum í hendur kl. 5 e. h. tveim dögum áður en fundur skal haldinn.

Bæjarstjóri skal senda bæjarfulltrúum dagskrá reglulegs bæjarstjórnarfundar, síðasta lagi fyrir kl. 5 e. h., daginn áður en fundur skal haldinn. Eigi að taka fundargerðir nefnda til umræðu og samþykktar á bæjarstjórnarfundum, þá skal eftirrit fundargerðar fylgja dagskránni. Önnur mál en þau, sem talin eru á dagskrá, má ekki taka til umræðu á fundum bæjarstjórnarinnar.

Mál skulu afgreidd í þeirri röð, er dagskrá segir til, nema meiri hluti bæjarstjórnar óski annars.

8. gr.

Bæjarstjóri á, samkvæmt embættisstöðu sinni, sæti á fundum bæjarstjórnar og má taka þar til máls, svo oft sem hann vill, en gæta skal hann þó fundarskapa. Ekki á bæjarstjóri atkvæðisrétt, nema hann sé jafnframt bæjarfulltrúi.

9. gr.

Sérhver maður getur borið fram breytingartillögur og viðaukatillögur við hvert það málefni, sem til umræðu er. Skulu slíkar tillögur vera skriflegar, en veita skal forseti fundarmönnum ráðrúm til að semja þær. Forseti sker úr því, hvornig haga skuli atkvæðagreiðslu um tillögur.

10. gr.

Bæjarstjórnarfundir skulu haldnir fyrir opnum dyrum. Skytt er þó að ræða fyrir luktum dyrum mál, sem varða einkalíf manna. Auk þess getur einn fundarmanna krafizt þess, að mál sé rætt fyrir luktum dyrum, og sker þá bæjarstjórn úr um það umræðulaust. Enginn má skýra frá umræðum í málum, sem rædd eru fyrir luktum dyrum.

11. gr.

Til þess að bæjarstjórnarfundur sé ályktunarfær, þarf meira en helmingur bæjarfulltrúa að vera mættur. Afl atkvæða ræður úrslitum. Ef atkvæði verða jafnmörg með og móti tillögu, telst hún fallin, en ef um kosningar er að ræða, skal varpa hlutkesti.

Um kosningu bæjarstjóra og stöður þær, er bæjarstjórn veitir, fer sem um kosningu forseta bæjarstjórnar.

12. gr.

Fundarmaður, sem vill taka til máls, skal snúa sér til forseta. Hann leyfir mönnum venjulega að taka til máls í þeirri röð, er þeir hafa kvatt sér hljóðs. Þó má breyta út af því, þegar bæjarstjóri eða framsögumaður á í hlut, svo og til þess, að ræður skiptist jafnt með og móti málefnum. Þá getur forseti leyft bæjarfulltrúa að gera stutta athugasemd eða leiðréttingu, er varðar sjálfan hann. Ef vafi leikur á í hvaða röð fundarmenn kveðja sér hljóðs, sker forseti úr.

Ef enginn fundarmanna hefur hvatt sér hljóðs, skal forseti bjóða fundarmönnum tvisvar að taka til máls, en hafi þá enginn óskað eftir að taka til máls, skal umræðum slitið og dagskrármálið tekið til afgreiðslu.

13. gr.

Flutningsmaður máls eða framsögumaður mega tala þrisvar við afgreiðslu máls, en aðrir bæjarfulltrúar tvisvar. Nær ákvæði þetta einnig til forseta. Forseti getur þó leyft bæjarfulltrúa að tala oftari, til þess að bera af sér ámæli, gera stutta fyrirspurn, athugasemd um atkvæðagreiðslu eða gæzlu fundarskapa.

Þegar forseti tekur til máls sem bæjarfulltrúi, skal hann víkja úr forsetastóli. Ræðumaður skal standa við sæti sitt meðan hann flytur ræðu sína.

14. gr.

Ræðumaður skal ávallt beina máli sínu til fundarins. Hann má ekki lesa prentað mál, nema með leyfi forseta.

Fundarmönnum er skytt að ávarpa hvern annan kurteislega og viðhafa ekki ósæmilegt orðbragð. Nú ber fundarmaður aðra menn brigslyrðum, lætur sér ósæmilegt orð um munn fara eða víkur verulega frá umtalsefninu, og skal þá forseti víta hann fyrir það og nefna þau orð, er hann vítir. Nú hefur fundarmaður verið tvisvar víttur á sama fundi, en lætur sér þó ekki skipast, og getur þá forseti svipt hann málfrelsi á þeim fundi. Ef fundarmaður hlýðnast ekki úrskurði forseta eða ef almenn óregla kemur upp á fundi, skal forseti fresta fundi um stundarsakir, eða slíta, ef honum þykir nauðsyn til bera.

15. gr.

Ef áheyrendur eru ekki kyrrir og hljóðir, eða trufla fund, getur forseti vísað þeim út og ef þörf gerist látið ryðja áheyrendasalinn.

16. gr.

Sérhver fundarmaður getur borið fram tillögu um að slíta umræðum þegar í stað, er honum finnast umræðurnar dragast úr hófi fram, og skal þá sú tillaga borin upp umræðulaust.

17. gr.

Atkvæðagreiðsla fer fram með handauppréttingu. Nafnakall skal þó hafa, ef forseti telur þess þörf eða einn fundarmanna óskar þess. Bæjarfulltrúa er skylt að greiða atkvæði við nafnakall, nema hann leiði rök að undanfærslu sinni, er forseti tekur gild, enda á bæjarfulltrúi rétt á að skjóta úrskurði forseta til fundarins, sem sker þá umræðulaust úr máli. Þegar um kosningar er að ræða, skulu þær vera skriflegar og leynilegar, nema allir fundarmenn séu sammála um annað. Við nafnakall greiða bæjarfulltrúar atkvæði eftir skrá, þar sem nöfn þeirra eru í staf-rófsröð og skal hlutkesti ráða á hverjum skal byrja.

18. gr.

Ekki er leyfilegt að bregða frá ákvæðum þessara fundarskapa, nema 6 bæjarfulltrúar hið fæsta séu því samþykkir.

Fundarsköp þessi, sem bæjarstjórn Siglufjarðarkaupstaðar hefur samið og samþykkt, staðfestist hér með samkvæmt sveitarstjórnarlögum nr. 58 29. marz 1961, til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Jafnframt eru úr gildi numin fundarsköp fyrir bæjarstjórn Siglufjarðar frá 14. desember 1938.

Félagsmálaráðuneytið, 6. júní 1963.

F. h. r.

Hjálmar Vilhjálmsson.

Hallgrímur Dalberg.

S A M Þ Y K K T**um stjórn bæjarmála í Siglufjarðarkaupstað.**

1. gr.

Bæjarstjórn Siglufjarðar er skipuð níu kjörnum bæjarfulltrúum. Þeir taka ákvarðanir á bæjarstjórnarfundum um þau málefni kaupstaðarins, er til bæjarstjórnar koma. Bæjarstjóra er rétt og skylt að sitja fundi bæjarstjórnar, en ekki á hann þar atkvæði, nema hann sé jafnframt bæjarfulltrúi.

Kosningar nefnda.

2. gr.

Einstökum málum kaupstaðarins stjórnar bæjarráð og aðrar fastar nefndir, er bæjarstjórn kýs með þeim takmörkunum er síðar greinir.

Þessar nefndir eru kosnar til fjögurra ára:

1. Bæjarráð.
2. Hafnarnefnd.
3. Rafveitunefnd.
4. Fræðsluráð.
5. Hólsbúsnefnd.